

Ismet Osmanović,
Poslanik u Predstavničkom domu Parlamenta Federacije BiH
Sarajevo

Bosna i Hercegovina
Federacija Bosne i Hercegovine
PARLAMENT FEDERACIJE
SARAJEVO

Primljeno: 19-07-2017			
Org. jed.	Broj	Priloga	Vrijedno
09,02	-02	-1440	/1

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
SARAJEVO 71 000

n/r gđa Lidija Bradara, predsjedavajuća Doma naroda Parlamenta FBiH
n/r g-din Ismir Hadžiavić, sekretar Doma naroda

n/r gosp. Edin Mušić, predsjedavajući Predstavničkog doma Parlamenta FBiH
n/r g-đa Stela Ibrović, v.d. sekretar Predstavničkog doma Parlamenta FBiH

PREDMET: Prijedlog zakona o boračkim udruženjima od posebnog društvenog značaja
i Izvještaj o provedenim javnim raspravama sa, d o s t a v l j a s e.-

Nakon provedene javne rasprave u prilogu Vam dostavljam Prijedlog zakona o boračkim udruženjima od posebnog društvenog značaja i Izvještaj o provedenim javnim raspravama.

Molim Vas da navedeni Prijedlog zakona uvrstite na dnevni red prve naredne sjednice Predstavničkog doma i Doma naroda Parlamenta Federacije BiH, radi razmatranja i donošenja.

S poštovanjem.

Sarajevo, 18.07.2017.godine

Poslanik u Predstavničkom domu PFBiH
Ismet Osmanović

ZAKON
O BORAČKIM UDRUŽENJIMA
OD POSEBNOG DRUŠTVENOG ZNAČAJA

I-OPĆE ODREDBE

Član 1.

Ovim zakonom uređuju se uvjeti, način i postupak za sticanje statusa boračkih udruženja od posebnog društvenog značaja za Federaciju Bosne i Hercegovine (u daljem tekstu: Federacija BiH), kao i uslovi, način i postupak za gubitak statusa boračkog udruženja od posebnog društvenog značaja, finansiranje programa i projekata tih udruženja iz Budžeta Federacije BiH.

Član 2.

Boračka udruženja od posebnog društvenog značaja za Federaciju BiH su udruženja koja okupljaju boračke kategorije iz člana 1. Zakona o pravima branilaca i članova njihovih porodica („Službene novine Federacije BiH“ br.33/04,56/05,70/07 i 9/10) i člana 1. Zakona o posebnim pravima dobitnika ratnih priznanja i odlikovanja i članova njihovih porodica („Službene novine Federacije BiH“ br 70/05,61/06 i 9/10) i ukoliko ispunjavaju i druge uvjete propisane ovim zakonom.

Član 3.

Boračka udruženja od posebnog društvenog značaja svoje ciljeve i djelatnost utvrđuju svojim aktima u skladu sa Ustavom Bosne i Hercegovine, Ustavom Federacije BiH i Zakonom o udruženjima i fondacijama („Službene novine Federacije BiH“ broj 45/02).

II-STICANJE I GUBITAK STATUSA BORAČKOG UDRUŽENJA OD POSEBNOG DRUŠTVENOG ZNAČAJA

Član 4.

(1) Status boračkog udruženja od posebnog društvenog značaja (reprezentativnost) stiče se rješenjem Federalnog ministarstva za pitanja boraca i invalida odbrambeno-oslobodilačkog rata/Federalnog ministarstva za pitanja branitelja i invalida domovinskog rata (u daljem tekstu: Federalno ministarstvo), ukoliko udruženje ispunjava slijedeće uvjete:

1. Da udruženje/savez registrovano na federalnom nivou okuplja najmanje 60% svojih članica registrovanih na nivou kantona sa istim baznim nazivom udruženja/saveza uz dodatak naziva kantona u kojem su registrovani, odnosno da kantonalno udruženje/savez registrovano na kantonalnom nivou okuplja najmanje

60% svojih članica koje djeluju na nivou gradova/općina sa istim baznim nazivom udruženja/saveza uz dodatak grada/općine na kojoj djeluju, a registrovanu na nivou istog kantona, i da gradsko/općinsko udruženje/savez okuplja najmanje 60% članova koje predstavlja na nivou jednog grada/općine;

2. Posebno udruženja/savezi demobilisanih boraca, pored obaveze iz prethodnog stava, dužni su putem gradskih/općinskih udruženja pribaviti dokaz o broju svojih članova, za AR BiH u ukupnom broju na nivou Federacije BiH minimalno 30.000 boraca, za HVO minimalno 10.000 boraca.
3. Samo jedno udruženje/savez iz određene kategorije po komponentama može steći status boračkog udruženja od posebnog društvenog značaja za Federaciju BiH.
4. Federalno ministarstvo, na zahtjev udruženja/saveza donosi rješenje kojim utvrđuje da li su ispunjeni uvjeti za sticanje statusa udruženja/saveza od posebnog društvenog značaja za Federaciju BiH.
5. Rješenje iz stava (1) ovog člana je konačno u upravnom postupku i protiv istog se ne može izjaviti žalba, ali se može pokrenuti upravni spor tužbom nadležnom sudu.

Član 5.

- (1) Podaci referentni za utvrđivanje potrebnog broja članstva za sticanje statusa boračkog udruženja od posebnog značaja su podaci kojima raspolaže Federalno ministarstvo.
- (2) Pripadnik boračkih populacija može biti član više udruženja, ali ne može se pojaviti na spisku za utvrđivanje reprezentativnosti više od jednog udruženja.
- (3) Član udruženja od posebnog značaja može biti u organima upravljanja samo jednog takvog udruženja.

Član 6.

- (1) Zahtjev za sticanje statusa boračkog udruženja/saveza od posebnog društvenog značaja podnosi se Federalnom ministarstvu na posebno propisanom obrascu.
- (2) Uz zahtjev za dobijanje statusa boračkog udruženja/saveza od posebnog značaja, ovlašteno lice u ime udruženja/saveza registrovanog na nivou Federacije BiH prilaže slijedeće dokaze:
 1. Rješenja nadležnog ministarstva pravde o registraciji udruženja/saveza ne starije od četiri godine, statut, ID broj, statistički broj, zapisnik sa zadnje održane izvještajne skupštine ne stariji od jednu godinu, zapisnik sa zadnje održane izborne skupštine sa odlukama o izboru i imenovanju upravnih tijela propisanih statutom ne starijim od četiri godine, odluke skupština nižeg nivoa organizovanja udruženja/saveza o pokretanju procedure za prijem u članstvo u veći nivo organizovanja udruženja/saveza i odluku skupštine većeg nivoa organizovanja udruženja/saveza o prijemu članice nižeg nivoa organizovanja udruženja/saveza i dokaz o broju članstva.
 2. Za udruženja/saveze demobilisanih boraca svih nivoa organizovanja (općina, grad, kanton i Federacija BiH) dodatno dostaviti spiskove članstva koji sadrže: ime, ime oca, prezime, JMB i svojeručni potpis člana. Spisak mora biti ovjeren od strane ovlaštenog lica za zastupanje i predstavljanje gradskog odnosno općinskog udruženja.

(3) Ukoliko zahtjev iz stava 1. ovog člana podnesu dva ili više udruženja demobilisanih boraca koja imaju članstvo više od 30.000 boraca ARBiH, odnosno više od 10.000 boraca HVO, status udruženja od posebnog društvenog značaja stiče udruženje koje okuplja veći broj boraca.

Član 7.

(1) Federalno ministarstvo će na zahtjev boračkog udruženja/saveza od posebnog društvenog značaja ili po službenoj dužnosti donijeti rješenje kojim se utvrđuje da udruženje/savez gubi status udruženja/saveza od posebnog društvenog značaja u slučaju:

1. brisanja udruženja/saveza iz registra udruženja kod Federalnog ministarstva pravde;
2. ukoliko odlukom nadležnog suda udruženju/savezu bude izrečena mjera zabrane rada;
3. ako udruženje/savez najmanje jednom godišnje ne održi izvještajnu skupštinu a najmanje jednom u četiri godine ne održi izbornu skupštinu;
4. ako najkasnije do 31.03. tekuće godine ne dostavi Federalnom ministarstvu izvještaj o radu i finansijski izvještaj;
5. ako izgubi članstvo ispod kvote propisane u članu 4. st. 1. tač. 1. i 2. ovog zakona.

Član 8.

(1) Udruženje/savez koje stekne status udruženja od posebnog društvenog značaja ima obavezu da u roku od 30 dana od dana saznanja o okolnostima iz člana 7. ovog zakona, obavijesti Federalno ministarstvo ukoliko nastupe te okolnosti, odnosno da podnese zahtjev za donošenje rješenja o gubitku statusa udruženja/saveza od posebnog društvenog značaja.

(2) Federalni ministar za pitanja boraca i invalida odbrambeno-oslobodilačkog rata/federalni ministar za pitanja branitelja i invalida domovinskog rata će u roku od 60 dana od dana stupanja na snagu ovog zakona donijeti pravilnik kojim će se pobliže razraditi odredbe ovog zakona koje se odnose na pitanja postupka utvrđivanja reprezentativnosti udruženja/saveza, obrasci za podnošenje zahtjeva, kao i druga pitanja u vezi sa sticanjem i gubitkom statusa boračkog udruženja/saveza od posebnog društvenog značaja.

III-FINANSIRANJE PROGRAMA I PROJEKATA

Član 9.

(1) Boračka udruženja/savezi od posebnog društvenog značaja za Federaciju BiH, imaju pravo predstavljanja članstva u pregovorima sa organima federalne vlasti u vezi sa uređivanjem statusnih pitanja pripadnika branilačke populacije i pravo apliciranja na sredstva iz Budžeta Federacije BiH, radi realiziranja svojih programa i projekata.

(2) Iz Budžeta Federacije BiH osigurat će se finansiranje programa i projekata udruženja iz stava 1. ovog člana, na osnovu odluke Vlade Federacije Bosne i Hercegovine i

javnog poziva, a u skladu sa strateškim i planskim dokumentima Vlade Federacije Bosne i Hercegovine.

- (3) Federalno ministarstvo raspisuje javni poziv i zaključuje ugovore o dodjeli sredstava sa udruženjima/savezima iz stava 1. ovog člana.

IV-IZVJEŠTAJI I PRAVDANJE SREDSTAVA

Član 10.

(1) Udruženja od posebnog društvenog značaja za Federaciju BiH, dužna su dostavljati Federalnom ministarstvu izvještaj o utrošku sredstava dodijeljenih u skladu sa članom 9. ovog zakona.

(2) Trošak se smatra opravdanim ukoliko je nastao za vrijeme trajanja projekta ili programa koji se finansira, a što se dokazuje odgovarajućim dokazom da je provedeno plaćanje ili preuzeta obaveza za plaćanje, kao i dokazom o pruženoj usluzi, nabavljenoj robi ili primljenim radovima, te da je utrošak finansijskih sredstava bio neophodan u svrhu realizacije projekta ili programa, da je računovodstveno evidentiran, kao i da je nastao u skladu sa važećim propisima i da podrazumijeva potpuno izmirenje obaveza za poreze i doprinose nastale provedbom projekta ili programa.

(3) Federalno ministarstvo će ispitati opravdanost troška na osnovu podnesenih izvještaja od strane udruženja/saveza, te u slučaju da određeni trošak ne zadovoljava uvjete da bude opravdan, zahtijevat će se povrat finansijskih sredstava u odgovarajućem iznosu ili će umanjiti ukupan iznos posljednje tranše finansiranja za isti.

V- NADZOR

Član 11.

Nadzor nad radom udruženja/saveza od posebnog društvenog značaja vrši Federalno ministarstvo, Federalno ministarstvo finansija i Federalno ministarstvo pravde, svako u okviru svoje nadležnosti.

VI-KAZNENE ODREDBE

Član 12.

(1) Novčanom kaznom od 1000,00 KM do 3000,00 KM kaznit će se za prekršaj odgovorno lice u udruženju/savezu ako Federalnom ministarstvu dostavi neistinite i netačne podatke iz člana 6. ovog zakona ili ne prijavi okolnosti zbog kojih se gubi status udruženja od posebnog društvenog značaja iz člana 7. ovog zakona, odnosno ne postupi u skladu sa članom 8. stav 1. ovog zakona.

(2) Za prekršaj iz stava 1. ovog člana kaznit će se udruženje/savez novčanom kaznom u iznosu od 10.000,00 KM.

VII-PRIJELAZNE I ZAVRŠNE ODREDBE

Član 13.

(1) Na pitanja koja nisu uređena ovim zakonom (opšta pravila registracije, unutrašnja struktura, finansiranje rada udruženja/saveza, prestanak rada i sva druga pitanja koja nisu propisana ovim zakonom), primjenjuju se odredbe Zakona o udruženjima i fondacijama („Službene novine Federacije BiH“, broj: 45/02).

(2) Udruženja/savezi iz člana 2. ovog zakona mogu osnivati fondacije u skladu sa zakonom iz stava (1) ovog člana.

Član 14.

Kantoni će svojim propisima urediti pitanja boračkih udruženja od posebnog društvenog značaja na nivou kantona, grada i općina u skladu sa ovim zakonom.

Član 15.

Ovaj zakon stupa na snagu osmog dana od dana objavljivanja u „Službenim novinama Federacije BiH“.

**OBRAZLOŽENJE
PRIJEDLOGA ZAKONA O BORAČKIM UDRUŽENJIMA
OD POSEBNOG DRUŠTVENOG ZNAČAJA**

I - USTAVNI OSNOV ZA DONOŠENJE ZAKONA

Ustavni osnov za donošenje ovog zakona sadržan je u odredbama IV A.20.(1) Ustava Federacije Bosne i Hercegovine. Prema toj odredbi Parlament Federacije Bosne i Hercegovine je nadležan za donošenje zakona o vršenju dužnosti federalne vlasti.

II - RAZLOZI ZA DONOŠENJE ZAKONA

Prijedlog Zakona o boračkim udruženjima od posebnog društvenog značaja pripremljen je u skladu sa dogovorom sa udruženjima koja okupljaju boračku populaciju, koja smatraju da je potrebno zakonski definisati status udruženja od posebnog društvenog značaja kako bi se u ovoj oblasti stvorili uslovi za bolju organizaciju boračkih udruženja i njihovo lakše i efikasnije funkcioniranje. Prema sadašnjim saznanjima trenutno u Federacije BiH na svim nivoima vlasti ima registrovano cca.1.600 boračkih udruženja. Ovim zakonom se nastoji smanjiti taj broj, osigurati bolja organizovanost i utvrditi koja su to udruženja reprezentativna, odnosno koja predstavljaju većinu boračke populacije sa kojima predstavnici društvenih institucija mogu meritorno rješavati pitanja i potrebe iz oblasti branilačko-invalidske zaštite.

III. JAVNA RASPRAVA

U skladu sa Zaključkom Doma naroda Parlamenta Federacije BiH usvojenog na 20. sjednici održanoj dana 30.03.2017. godine, broj: 02-02-1240/16 od 31.03.2017. godine, Federalno ministarstvo za pitanja boraca i invalida odbrambeno-oslobodilačkog rata zaduženo je da zajedno sa predlagачem Zakona o boračkim udruženjima od posebnog društvenog značaja gosp. Ismetom Osmanovićem organizuje i provede javnu raspravu u trajanju od 60 dana u svih deset kantona. U vezi sa navedenim zaključkom o provođenju Javne rasprave, federalni ministar za pitanja boraca i invalida odbrambeno-oslobodilačkog rata Doc.dr. Salko Bukvarević donio je Odluku o terminu i mjestu provođenja javne rasprave broj: 01-41-2203/17 od 18.04.2017. godine, kao i Operativni plan provođenja javne rasprave.

Javna rasprava o Nacrtu zakona o boračkim udruženjima od posebnog društvenog značaja provedena je u deset kantona u periodu od 27.04.2017. godine do 15.06.2017. godine u saradnji sa kantonalnim ministarstvima i upravama za pitanja boraca i invalida odbrambeno-oslobodilačkog rata. Na javne rasprave su pozvani predstavnici boračkih udruženja, te predstavnici kantonalne i općinske vlasti. Izvještaj o provedenoj Javnoj raspravi u svih deset kantona dostavljen je Parlamentu Federacije BiH.

Prihvaćeni prijedlozi izneseni sa Javnih rasprava:

- Prihvaćeni su i ugrađeni u Prijedlog zakona, većina zajedničkih pismenih prijedloga-amandmana Saveza RVI Federacije BiH, HVIDRA-e, Organizacije porodica šehida i poginulih boraca F BiH, Udruge obitelji poginulih i nestalih branitelja domovinskog rata HR HB, Saveza boraca F BiH, Udruge veterana i dragovoljaca domovinskog rata HVO HB, Saveza dobitnika najvećih ratnih priznanja F BiH i Udruge nositelja ratnih odličja HVO.

- Prihvaćeno je da se iz člana 2. brišu udruženja koja baštine tekovine antifašističkih odbrambeno-oslobodilačkih ratova (prijedlozi na Javnoj raspravi u Tuzlanskom kantonu, Srednjobosanskom kantonu, Hercegovačko-neretvanskom kantonu, Zapadno-hercegovačkom kantonu, Kantonu 10., Zeničko-dobojskom kantonu, Udruga zaboravljenih branitelja/boraca).
- Prihvaćeno je da se u članu 3. doda puni naziv Zakona o udruženjima i fondacijama („Službene novine Federacije BiH“, broj: 45/02)- prijedlog na javnoj raspravi u Tuzli.
- Prihvaćeno je da udruženja federalnog nivoa treba da imaju najmanje 6 kantonalnih organizacija, s tim što je to utvrđeno u procentu od 60% (član 4. stav 1. tač. 1. Prijedloga zakona) - prijedlog na Javnoj raspravi u TK, ZE-DO kantonu, KS i pismeni prijedlog Koordinacionog odbora boračkih organizacija KS;
- da se u Zakon unese da u Federaciji BiH mogu biti samo tri udruženja od posebnog društvenog značaja po komponentama A R BiH i HVO i MUP-a (obitelji poginulih, RVI, demobilisani borci)- prijedlog JOB-a Donji Vakuf, prijedlog prihvaćen s tim što su u članu 2. Prijedloga zakona obuhvaćeni i dobitnici ratnih priznanja i odlikovanja.
- Prihvaćeno je da se jasno definiše pojam kategorija udruženja od posebnog društvenog značaja u skladu sa Zakonom o pravima branilaca i članova njihovih porodica (članom 2. Prijedloga zakona data je definicija kategorija u skladu sa Zakonom o pravima branilaca i članova njihovih porodica i Zakonom o posebnim pravima dobitnika ratnih priznanja i odlikovanja i članova njihovih porodica) – prijedlozi TK.
- Prijedlog da se u članu 3. unese puni naziv zakona na koji se odnosi- prijedlog Organizacija demobilisanih boraca Kalesija. Prijedlog prihvaćen u članu 3. Prijedloga zakona unesen je puni naziv Zakona o udruženjima i fondacijama.
- Prihvaćeno je da se u Prijedlog zakona unesu kaznene odredbe (član 12. Prijedloga zakona) - predloženo na Javnoj raspravi u Tuzli i JOB Unija veterana Donji Vakuf i Organizacija demobilisanih boraca Općine Kalesija.
- Prihvaćeno je da Federalno ministarstvo vrši samo finansijski nadzor udruženja od posebnog društvenog značaja (članom 11. Prijedloga zakona uređuje se da nadzor nad radom udruženja od posebnog društvenog značaja vrši Federalno ministarstvo za pitanja boraca i invalida odbrambeno-oslobodilačkog rata, Federalno ministarstvo pravde i Federalno ministarstvo finansija, svako u okviru svoje nadležnosti),
- Prihvaćeno je da se ne vrši ponovna preregistracija udruženja – prijedlozi sa Javne rasprave u Kantonu Sarajevo, Tuzlanskom kantonu;
- Prijedlog da jedna osoba ne može biti član više udruženja – prijedlog na javnoj raspravi u TK, ZHK i pismeni prijedlog Udruge zaboravljenih branitelja i Organizacije demobilisanih boraca Općine Kalesija.
- Prihvaćeno je da se jedna osoba ne može pojaviti na spisku za utvrđivanje reprezentativnosti kod više od jednog udruženja (član 5. stav 2. Prijedloga zakona). Ne može se prema Ustavu F BiH i Evropskoj konvenciji o zaštiti ljudskih prava ograničiti udruživanje, odnosno učlanjenje u više udruženja. Međutim za utvrđivanje reprezentativnosti utvrđen je uvjet da se jedna osoba može pojaviti samo na spisku jednog udruženja od posebnog društvenog značaja.
- Prijedlog da se precizira način finansiranja – (prijedlog Općine Novi Travnik, Službe za BIZ Općine Visoko, i Udruge zaboravljenih branitelja/boraca). Prijedlog prihvaćen, preciziran je način finansiranja kao i način izvještavanja i pravdanja sredstava (član 9. i 10. Prijedloga zakona).
- Prijedlog da se u članu 5. dodaju „podaci o članstvu koje dostavlja udruženje koje podnosi zahtjev za priznavanje statusa udruženja od posebnog društvenog značaja“-prijedlog Koordinacionog odbora boračkih organizacija Kantona Sarajevo. Prijedlog je prihvaćen i ugrađen u član 6. stav 2. tač.1. Prijedloga zakona.

- Prijedlog da se uredi pitanje udruženja lokalnog nivoa, odnosno nivoa kantona i općina, prijedlog prihvaćen - prijedlog Službe za BIZ Općine Visoko i „Sinovi Drine“ Goražde.

Obrazloženje:

Prijedlog je prihvaćen, članom 14. Prijedloga zakona propisano je da će kantoni svojim propisima u skladu sa ovim zakonom urediti pitanje udruženja od posebnog društvenog značaja na nivou kantona, grada i općine.

Nisu prihvaćeni slijedeći prijedlozi:

- Prijedlozi da se u članu 2. Zakona navedu organizatori i pokretači otpora, RVI 100%-paraplegičari, Zelene beretke, Patriotska liga, Specijalna jedinica Bosna, – prijedlog na Javnoj raspravi u KS, USK i ZE-DO kantona i Koordinacionog odbora boračkih organizacija Kantona Sarajevo. Savez RVI paraplegičara Federacije BiH predlaže da se u zakon unese i kao udruženje od posebnog društvenog značaja i Savez RVI paraplegičara F BiH. Prijedlog da se decidno nabroje udruženja od posebnog društvenog značaja- prijedlog Udruženja „Sinovi Drine“ Goražde.

U ZHK su na Javnoj raspravi predložili da se u zakon unese Udruga zaboravljenih branitelja i oboljelih od PTSP. Udruga zaboravljeni branitelji /borci BiH, u svom pismenom prijedlogu predlaže da se kao sedma udruga od posebnog društvenog značaja: pored udruge RVI, Udruge obitelji poginulih i Udruge demobiliziranih obje komponente, u Zakon unese Udruga zaboravljenih branitelja/boraca BiH koja okuplja obje komponente.

Obrazloženje: Prijedlozi nisu prihvaćeni jer navedene kategorije boraca svoje interese i socijalno-statusna pitanja mogu ostvarivati putem udruženja iz člana 1. Zakona o pravima branilaca i članova njihovih porodica i člana 1. Zakona o posebnim pravima dobitnika ratnih priznanja i odlikovanja i članova njihovih porodica, a intencija ovog zakona je ujedinjenje boračkih udruženja odnosno njihovo ukрупnjavanje i stvaranje uvjeta za utvrđivanje statusa reprezentativnih udruženja/saveza, koja će kao predstavnici boraca učestvovati u pregovorima sa organima vlasti.

-Prijedlozi da se uvede moratorij na finansiranje udruženja nije prihvaćen – prijedlog sa Javne rasprave u SBK, JOB Donji Vakuf, Regionalno udruženje organizatori otpora Sove krajine.

Obrazloženje: Da bi se realizovali programi i projekti od značaja za boračke populacije nije realan prijedlog da se uskrati pomoć javnog sektora u sufinansiranju tih programa i projekata.

-Prijedlog da se formira jedno jedinstveno udruženje- prijedlozi na javnoj raspravi ,pisani prijedlog Regionalnog udruženja Sove krajine.

Obrazloženje: Prijedlog nije prihvaćen jer se ovim zakonom ne može nametnuti niti ograničiti volja udruživanja, to zavisi od samih udruženja koja se mogu udružiti i organizovati u jedno udruženje u skladu sa Zakonom o udruženjima i fondacijama. Ovim zakonom obuhvaćena su udruženja koja okupljaju boračke populacije iz člana 1. Zakona o pravima branilaca i članova njihovih porodica i članom 1. Zakona o posebnim pravima dobitnika ratnih priznanja i odlikovanja i članova njihovih porodica.

-Prijedlog da se za udruženje od posebnog društvenog značaja umanje ili povećaju kvote umjesto 30.000 demobilisanih boraca da se u Zakon unese 50.000 za AR BiH, a umjesto 10.000 za HVO, da se unese 20.000 – prijedlog na Javnoj raspravi U SBK.

Prijedlog Službe za BIZ Općine Visoko da kvota iz člana 4. umjesto 55% bude 80%. Zatim da se procenat 55% članstva umanje na 50 % +1 - prijedlog na Javnoj raspravi u KS i u Posavskom kantonu. Prijedlog da udruženja od posebnog društvenog značaja okupljaju 100% članova kategorije kojoj pripadaju po komponentama- Prijedlog Udruge zaboravljenih branitelja.